

## 'Cuti khas penjawat awam jadi sukarelawan pasca banjir' - KSN

Oleh BERNAMA - Disember 28, 2021 @ 3:38pm



Ketua Setiausaha Negara, Tan Sri Mohd Zuki Ali (depan, kiri) menyantuni sambil menyampaikan sumbangan Bantuan Wang Ihsan kepada mangsa banjir dari enam buah kampung yang terabit di Temerloh, hari ini.

TEMERLOH: Kerajaan mempertimbangkan cuti khas kepada penjawat awam yang terabit sebagai sukarelawan pasca banjir, kata Ketua Setiausaha Negara, Tan Sri Mohd Zuki Ali.

Beliau berkata, pemberian cuti itu akan membolehkan lebih ramai penjawat awam turun membantu operasi pembersihan selepas banjir, terutamanya di kawasan yang teruk terjejas dan memerlukan ramai tenaga kerja.

"Ramai (penjawat awam) yang ingin menjadi sukarelawan membantu mereka yang terkesan tapi kadang-kadang mereka tiada saluran sesuai, selain terikat dengan peraturan seperti tidak boleh keluar pada waktu pejabat," katanya.

Mohd Zuki berkata demikian selepas menyerahkan Bantuan Wang Ihsan (BWI) kepada 132 ketua keluarga mangsa banjir di Pusat Pemindahan Sementara (PPS) Sekolah Menengah Kebangsaan Sri Tualang di sini hari ini.

Turut hadir Ketua Polis Pahang, Datuk Ramli Mohamed Yoosuf dan Pengerusi Jawatankuasa Pelancongan, Kebudayaan, Alam Sekitar, Perladangan dan Komoditi Pahang Mohd Sharkar Shamsuddin.

Mohd Zuki berkata, pemberian cuti khas itu adalah sama seperti diumumkan Menteri Komunikasi dan Multimedia Tan Sri Annuar Musa semalam, iaitu cuti tanpa rekod diberikan kepada pegawai Kementerian Komunikasi dan Multimedia (KKMM) dan agensi yang menjadi sukarelawan Program Bantu Hingga Selesai anjuran kementerian itu.

Beliau dalam pada itu berkata kementerian-kementerian juga akan digerakkan untuk membantu operasi pascabanjir bagi mempercepatkan kerja-kerja yang sedang dilaksanakan.

- BERNAMA